

Dumonda Paterlini concernent la reducziun da birocrazias en ils fatgs da sanadad!

Dapi passa 20 onns creschan ils custs da sanadad e cun els las premias da las cassas da malsauns onn per onn en l'entira Svizra. Er il svilup dals custs en las chasas da persunas attempadas e da tgira enconuscha mo ina direcziun. Ils svilups generals dals salaris, l'augment da las pretensiuns da qualitat areguard la construcziun ed il manaschi sco er auters svilups chaschunan custs supplementars per las abitantas ed ils abitants da las chasas, per las cassas da malsauns e per las vischnancas.

I èn numerusas prestaziuns che ston vegnir furnidas a favur da las abitantas e dals abitants da las chasas. Bleras da quellas pervia da las revisiuns parzialas da la lescha per promover la tgira da persunas malsaunas e da las ordinaziuns appartegentas. I dat dentant er prestaziuns che n'han nagin connex direct cun in'assistenza qualitativamain buna da las abitantas e dals abitants da las chasas.

Quai n'èn betg prestaziuns en il sector da la tgira, dal servetsch da chasa e da l'hotellaria, mabain prestaziuns en l'administraziun, sco per exempel il rendaquint, la moda e maniera da la revisiun sco er mesiras per garantir la qualitat.

Tenor l'art. 27 al. 1 da la lescha per promover la tgira da persunas malsaunas sco er tenor l'art. 2 al. 1 da l'ordinaziun tar la lescha per promover la tgira da persunas malsaunas (OLTM) dal chantun Grischun ston las chasas da tgira far il rendaquint tenor ils principis da la fundaziun Swiss GAAP RRQ. Quai cumbain che questas prescripziuns èn previsas per manaschis cun passa 50 plazzas a temp cumplain, cun ina summa da bilantscha da 10 miu. e cun ina svieuta annuala da 20 miu. Tranter las 53 chasas da tgira en il chantun hai numerus manaschis pitschens che han per part main che 20 letgs e che na cuntanschan lunschor betg las grondezzas numnadas.

Sumegliant èsi cun las prescripziuns chantunalas concernent la moda e maniera da la revisiun. Tut las chasas ston far ina revisiun ordinaria. Igl è ina revisiun pli extendida e consequentamain pli chara, e quai per chasas cun main che 20 letgs! Quai cumbain ch'il dretg d'obligaziuns prescriba ina revisiun ordinaria per manaschis cun passa 50 plazzas a temp cumplain, cun ina summa da bilantscha da 10 miu. e cun ina svieuta annuala da 20 miu., sche almain duas da las grondezzas numnadas èn surpassadas.

Sut quest aspect vulan las sutsegnadras ed ils sutsegnaders savair da la regenza:

1. Tge motivs ha la regenza d'insister sin la birocrazia numnada?
2. Tge niz direct porta la birocrazia descritta a las abitantas ed als abitants da chasas fitg pitschnas?
3. Tge avantatgs han las vischnancas, che ston surpigliar ils deficits, tras las prescripziuns chantunalas descrittas?

Cuira, ils 22 d'october 2019

Paterlini, Engler, Hohl, Baselgia-Brunner, Berther, Berweger, Bettinaglio, Brandenburger, Brunold, Buchli-Mannhart, Cahenzli-Philipp, Cavegn, Crameri, Danuser, Degiacomi, Della Cà, Deplazes (Rabius), Derungs, Dürler, Epp, Felix, Gartmann-Albin, Gasser (Cuira), Gort, Gugelmann, Hardegger, Hitz-Rusch, Holzinger-Loretz, Horrer, Hug, Jenny, Jochum, Kienz, Kohler, Kunfermann, Kunz (Fläsch), Kuoni, Locher Benguerel, Loepfe, Maissen, Michael (Donat), Müller (Susch), Natter, Papa, Perl, Preisig, Ruckstuhl, Rüegg, Rutishauser, Salis, Sax, Schmid, Schneider, Schutz, Thomann-Frank, Thür-Suter, Tomaschett-Berther (Trun), Ulber, von Ballmoos, Waidacher, Weber, Wellig, Widmer (Favugn), Widmer-Spreiter (Cuira), Zanetti (Sent), Fasani-Horath, Patzen, Sturzenegger